

եղաւ՝ ամբողջապէս սպիտակ հագած, որ իսկոյն պահանջեց մեր ճապոնական անցագրերը: Այդ անցագիրը անհրաժեշտ է ամեն եւրոպացու, որ կամենում է ներքին գաւառները ոտք դնել: Տոմսակ գնելիս՝ նոյնպէս հարցրին այդ անցագիրը:

Դեռ բաւական ժամանակ կար մեր գնացքին: Ուզեցի ելնել հարթակը, չը թողին: Ստիպւած էի բաւականանալու կայարանի պատուհանով: Գնացքները անընդհատ գնում էին ու գալիս: Շարժումը մեծ էր: Ճապոնացին ճամփորդութիւն սիրում է: Վագօնները լի էին բերնէ բերան:

Երբ հերթը վերջապէս մեզ հասաւ, սրահի դռները լայն բաց արին ու մենք խոռոն բազմութեամբ դուրս թափեցինք հարթակը. մեր առաջը փակած էր վանդակով. ուղեւորների համար մի նեղ անցք կար միայն, ուր կանգնած էր կօնդուկտօրը եւ ստուգում էր տոմսակները:

Ամենքը խոնւում են դէպի այդ մուտքը, հրում, սեղմում, մինչեւ որ վերջապէս դուրս են գալիս վագօնների առաջ եղած ազատ տեղը, բոլորովին ուժասպառ ու ժմրուտած:

Ուղին նեղ գիծ է, վագօնները փոքր, նստարանները պատի տակ:

Գնացքը կայարանից դուրս սողաց թէ չէ, մեր առաջ բացւեց ծովը իր բոլոր գեղեցկութեամբ եւ հեռուն կանգնած շոգենաւերով:

Հետզհետէ այդ կապոյտ շերտը սկսեց նեղանալ, հեռանալ, մինչեւ որ իսպառ կորաւ աչքից: Առջեւս փուած էր այժմ լայն դաշտը, ամբողջապէս ծածկւած բրնձի կանաչ տունկով: Արդէն ծանօթ տեսարան: Նոյն ջրով ծածկւած մարգերը, նոյն բանւորները մինչեւ ծունկը ջրի մէջ աշխատելիս: Չկային միայն առունները իրանց կարկաչով,